

Perlumbaan drag: AADK bukan penganjur bersama

oleh NIK AMIRULMUMIN NIK MIN 06 September 2023 05:48pm **Masa membaca: 2 minit**



Laporan Sinar Harian pada Selasa

PEKAN - Agensi Anti Dadah Kebangsaan (AADK) tidak terlibat sebagai penganjur bersama Malaysia Drag Bike National ET Record Championship 2023 Road Tour 2023 yang berlangsung di sini hujung minggu lalu.

Ketua Polis Daerah Pekan, Superintenden Mohd Zaidi Mat Zin berkata, agensi itu sebaliknya telah menarik diri memandangkan perlumbaan terbabit tiada kelulusan Kementerian Belia dan Sukan (KBS).

Menurutnya, kenyataan polis yang dikeluarkan hasil siasatan awal pegawai penyiasat trafik Ibu Pejabat Polis Daerah (IPD) Pekan sebelum ini berlaku kesilapan.

"Berdasarkan kenyataan penganjur, acara itu turut melibatkan AADK bagaimanapun agensi terbabit sebenarnya telah pun menarik diri. Kesilapan amat dikesali," katanya dalam satu kenyataan pada Rabu.

Perlumbaan Malaysia Drag Bike National ET Record Championship 2023 Road Tour 2023 menjadi sorotan ekoran kemalangan yang berlaku hingga meragut nyawa seorang pelumba drag, Muhammad Hattem Rashdi, 22.

Hattem dilaporkan mengalami kecederaan parah apabila motosikal ditunggangnya terbabas pada hari pertama perlumbaan tengah malam, Ahad lalu.

Mangsa yang mewakili ESR Motor menerima rawatan di Hospital Tengku Ampuan Afzan (HTAA) Kuantan dan menghembuskan nafas terakhir pada petang Selasa selepas bertarung nyawa lebih 12 jam.